



Broj: 01-50-1-15-58/09
Sarajevo, 22. juli 2009. godine

Z A P I S N I K

58. sjednice Predstavničkog doma Parlamentarne skupštine Bosne i Hercegovine, održane 22. jula 2009. godine

Sjednica je počela u 10 sati. Prisustvovalo je 38 poslanika. Odsustvo su opravdali: Sead Jamakosmanović, Azra Hadžiahmetović, Jovan Todorović i Hadži Jovan Mitrović.

Iz Vijeća ministara BiH sjednici su prisustvovali predsjedavajući Nikola Špirić, ministri: Tarik Sadović, Bariša Čolak i Sredoje Nović, te zamjenici ministara: Mijo Krešić, Živko Marjanac i Mladen Simić.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, EUPM-a, USAID PSP u BiH, Ambasade Velike Britanije te nevladine organizacije Centri civilnih inicijativa.

Predsjedavajući Beriz Belkić obrazložio je izmjene i dopune predloženog dnevnog reda.

Denis Bećirović predložio je da se dnevni red dopuni tačkom: Razmatranje sigurnosne situacije u Tuzlanskom kantonu i Tuzli, s posebnim osvrtom na zaključke vanredne sjednice Općinskog vijeća Tuzla (dostavljeni Parlamentarnoj skupštini BiH 7.7.2009.).

Remzija Kadrić je, u vezi s tačkom 21. Potvrđivanje Odluke predsjedavajućeg Vijeća ministara BiH o smjeni ministra sigurnosti BiH i zamjenika predsjedavajućeg Vijeća ministara BiH Tarika Sadovića, kazao da je materijal za ovu tačku nedovoljan i zatražio da se dostavi pismo SDA vezano za smjenu kako bi se i o tome mogla voditi rasprava.

Predsjedavajući Beriz Belkić konstatirao je da su predstavnici Vijeća ministara BiH koji su prisutni sjednici čuli ovaj prijedlog za dopunu materijala. Zatim je dao na glasanje prijedlog Denisa Bećirovića za dopunu dnevnog reda.

Dom je, s 27 glasova „za“ (iz Federacije BiH 22, iz Republike Srpske pet), jednim „protiv“ i osam „suzdržanih“ glasova, usvojio prijedlog Denisa Bećirovića za dopunu dnevnog reda.

Predsjedavajući je za 58. sjednicu Predstavničkog doma konstatirao sljedeći

D N E V N I R E D

1. Usvajanje Zapisnika 57. sjednice Predstavničkog doma;
2. Poslanička pitanja:
 - a) Komentari na dobivene odgovore,
 - b) Nova poslanička pitanja;
3. Zahtjev poslanika Stranke za BiH za razmatranje Prijedloga zakona o dopuni Zakona o plaćama i naknadama u institucijama BiH po hitnom postupku, u skladu s članom 127. Poslovnika;
4. Zahtjev poslanika Jerka Ivankovića Lijanovića za razmatranje Prijedloga zakona o izmjenama Zakona o akcizama u BiH po hitnom postupku, u skladu s članom 127. Poslovnika;
5. Zahtjev Vijeća ministara BiH za razmatranje Prijedloga zakona o izmjeni i dopuni Okvirnog zakona o visokom obrazovanju BiH po hitnom postupku, u skladu s članom 127. Poslovnika;
6. Zahtjev poslanika Adema Huskića za razmatranje Prijedloga zakona o dopuni Zakona o službenom glasilu BiH po skraćenom postupku, u skladu s članom 126. Poslovnika;

7. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH, predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku (drugo čitanje);
8. Prijedlog zakona o izmjenama i dopunama Zakona o plaćama i naknadama u institucijama BiH (drugo čitanje);
9. Prijedlog zakona o izmjenama i dopunama Zakona o sportu u BiH, predlagač: poslanik Denis Bećirović (drugo čitanje);
10. Prijedlog zakona o izmjenama i dopunama Izbornog zakona BiH, s Mišljenjem Ustavnopravne komisije (predlagač: Komisija za ostvarivanje ravnopravnosti spolova);
11. Prijedlog zakona o izmjenama i dopunama Zakona o slobodi pristupa informacijama u BiH – predlagači: poslanici Sefer Halilović, Vinko Zorić, Mirko Okolić, Šemsudin Mehmedović, Denis Bećirović, Velimir Jukić i Adem Huskić (prvo čitanje);
12. Izvještaj komisije Kolegija o nastojanju za postizanje saglasnosti o Prijedlogu zakona o izmjeni Zakona o državnoj himni BiH (zakon u prvom čitanju);
13. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Krivičnog zakona BiH, predlagači: poslanici Ekrem Ajanović, Adem Huskić i Remzija Kadrić (zakon u prvom čitanju);
14. Izvještaj komisije Kolegija o nastojanju za postizanje saglasnosti o Inicijativi poslanika Sadika Ahmetovića za uvrštavanje u dnevni red Predstavničkog doma tačke: Proglašenje 11. jula Danom sjećanja u cijeloj Bosni i Hercegovini na žrtve genocida koji je 1995. godine počinjen u Srebrenici;
15. Razmatranje Gender akcionog plana Vijeća ministara BiH i preporuka UN-ovog Komiteta za eliminaciju diskriminacije žena s prijedlogom zaključaka Komisije za ostvarivanje ravnopravnosti spolova;
16. Specijalni izvještaj ombudsmena za ljudska prava BiH u vezi sa žalbama žena radi prava na naknade plaća za vrijeme porodijskog odsustva;
17. Informacija o lišavanju slobode u Republici Hrvatskoj Vjekoslava Vukovića, pomoćnika ministra sigurnosti BiH, i aktivnostima preduzetim nakon tog događaja;
18. Imenovanje članova Vijeća Regulatorne agencije za komunikacije (prijedlog Vijeća ministara BiH);
19. Imenovanje predsjednika, zamjenika predsjednika i članova Nezavisnog odbora i Odbora za žalbe građana kao nezavisnih tijela policijske strukture BiH (prijedlog Ad hoc Zajedničke komisije za provođenje procedure imenovanja Nezavisnog odbora i Odbora za žalbe građana);
20. Potvrđivanje Odluke predsjedavajućeg Vijeća ministara BiH o smjeni ministra sigurnosti BiH i zamjenika predsjedavajućeg Vijeća ministara BiH Tarika Sadovića;
21. Prijedlog odluke o dopuni Odluke o imenovanju članova Vijeća nacionalnih manjina BiH (predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku);
22. Razmatranje „Zaključaka o štetnosti antidejtonskog i jednostranog djelovanja predsjednika Republike Srbije Borisa Tadića u državi Bosni i Hercegovini“, predlagač: poslanik Denis Bećirović;
23. Razmatranje sigurnosne situacije u Tuzlanskom kantonu i Tuzli, s posebnim osvrtom na zaključke vanredne sjednice Općinskog vijeća Tuzla (dostavljeni Parlamentarnoj skupštini BiH 7.7.2009.);
24. Davanje saglasnosti za ratifikaciju:
 - a) Sporazuma o uspostavljanju Regionalne škole za javnu upravu (ReSPA),
 - b) Dodatnog protokola uz Evropsku konvenciju o uzajamnoj pomoći u krivičnim stvarima,
 - c) Konvencije o procjeni okolišnih uticaja u prekograničnom kontekstu – Espoo (Finska), 25. februara 1991. godine,
 - d) Konvencije o sprečavanju većih industrijskih nezgoda, br. 174. iz 1993. godine, i Preporuka o sprečavanju većih industrijskih nezgoda, br. 181. iz 1993. godine, Međunarodne organizacije rada,
 - e) Preporuke o otvaranju radnih mjesta u malim i srednjim preduzećima, br. 189. iz 1998. godine, Međunarodne organizacije rada,

- f) Preporuke o promoviranju zadruga, br. 193. iz 2002. godine, Međunarodne organizacije rada,
- g) Preporuke koja se odnosi na listu profesionalnih oboljenja, br. 194. iz 2002. godine, Međunarodne organizacije rada,
- h) Preporuke o razvoju ljudskih potencijala, obrazovanju, osposobljavanju i stalnom usavršavanju, br. 195. iz 2004. godine, Međunarodne organizacije rada,
- i) Preporuke koja se tiče radnog odnosa, br. 198. iz 2006. godine, Međunarodne organizacije rada.

Ad. 1. Usvajanje Zapisnika 57. sjednice Predstavničkog doma

Nije bilo rasprave o Zapisniku.

Zapisnik 57. sjednice usvojen je sa 35 glasova „za“ (iz Federacije BiH 25, iz Republike Srpske 10), jednim „protiv“ i jednim „suzdržanim“ glasom.

Ad. 2. Poslanička pitanja

Odgovore su komentirali: Sadik Bahtić i Remzija Kadrić.

Nije bilo pitanja u okviru komentara na dobivene odgovore.

Postavljena su nova poslanička pitanja kako slijedi:

Šefik Džaferović:

“Dokle se stiglo s realizacijom biometrijskog pasoša u BiH? Da li postoji, uz pojačane napore svih nas u BiH, mogućnost da BiH još tokom ili početkom oktobra, prije dolaska Monitoring tima EU počne sa izdavanjem biometrijskih pasoša?”

(Ministar civilnih poslova BiH Sredoje Nović na sjednici je usmeno odgovorio na ovo pitanje.)

Denis Bećirović:

“Kako je moguće da generalni direktor i dva zamjenika generalnog direktora Direkcije za civilno zrakoplovstvo BiH i danas obavljaju navedene funkcije, odnosno koje su pravne radnje preduzete u tom smislu, jer im je mandat istekao čak prije tri godine?”

Sadik Bahtić:

1. Da li ste imali informaciju i šta ste preduzeli povodom četničkog orgijanja Ravnogorskog četničkog pokreta na ulicama Srebrenice, samo dan nakon dženaze u Potočarima, gdje su ukopane 534 nove žrtve genocida?
2. Šta planirate uraditi, preduzeti u narednom periodu da se BiH uvrsti na Bijelu šengensku listu i da u paketu sa ostalim zemljama zapadnog Balkana uspostavi bezvizni režim sa zemljama EU?

Mehmed Suljkanović:

„Kakva je sudbina zaključaka sa 47. sjednice Predstavničkog doma, održane 4. marta 2009., a vezano za usvajanje Zakona o dopuni Zakona o carinskoj tarifi BiH?“

Bajazit Jašarević:

„Koliko je prikupljeno javnih prihoda na jedinstveni račun po osnovu PDV-a, akciza i carina i koliko je to u odnosu na plan za period 1.1.2009. do 30.6.2009.? Molim da se iznesu ocjene razloga zbog kojih je došlo do smanjenja u prikupljanju javnih prihoda po osnovu PDV-a, akciza i carina. Da li postoji program za efikasniji rad Uprave za indirektno oporezivanje koji se realizira u 2009. godini? Ako postoji, molim da se uz odovor dostavi i program za efikasniji rad Uprave za indirektno oporezivanje.“

Šemsudin Mehmedović:

„Na osnovu kojih propisa su donesene odluke Agencije za poštanski saobraćaj o visini troškova za izdavanje licence?“

Lazar Prodanović:

„Da li je i ako jeste kada je planirano uspostavljanje carinske ispostave Bratunac?“

Rifat Dolić:

Uputio je poslaničku inicijativu finansijskim policijama u Federaciji BiH i Republici Srpskoj „za kontrolu poslovanja i kontrolu zakonitosti rada mikrokreditnih organizacija u BiH i preduzimanje mjera zbog primjene lihvarskih kamata i poticanja negativnih posljedica finansijske krize i recesije u BiH“.

Remzija Kadrić:

„Ko je osnovao Trgovačko društvo „Riva - Trpanj“, društvo s ograničenom odgovornošću i koja mu je osnovna djelatnost? A u vezi s tim i drugo potpitanje - iz kojih razloga nije imenovano rukovodstvo Direkcije za upravljanje pasivnim podbilansom preduzeća i banaka a trebalo je biti imenovano s ciljem provođenja Aneksa g) Sporazuma o pitanju sukcesije bivše SFRJ?“

Adem Huskić:

1. Da li Kompanija „Elektroprenos BiH“ normalno funkcioniše u skladu sa zakonom?
2. Ko i zašto osporava provedenu reformu elektrosektora u BiH, te tako dovodi u pitanje izvršavanje međunarodnih obaveza koje je BiH preuzela?
3. Da li Centralna izborna komisija BiH vodi imovinske kartone načelnika općina te državnih službenika zaposlenih u organima za kontrolu poreskih obveznika i da li SIPA prati način sticanja bogatstva navedenih kategorija građana?

Branko Dokić:

„Da li je formirana ekspertna radna grupa po zaključku oba doma Parlamentarne skupštine BiH, a na našem domu je to bilo 3. decembra 2008., po kojem se traži od Vijeća ministara BiH da osnuje radnu grupu u kojoj bi bili eksperti iz oblasti javnog emitiranja sa zadatkom da procijene usklađenost Zakona o javnom RTV sistemu BiH i Zakona o Javnom RTV servisu BiH sa Ustavom BiH i evropskim standardima iz ove oblasti, te da na osnovu toga bude sačinjen prijedlog za eventualne izmjene i dopune ovog zakona?“

Drago Kalabić:

1. Uputio je inicijativu Predstavničkom domu da osnuje istražnu komisiju sa zadatkom da provjeri navode u vezi s raspodjelom CEMT dozvola u Ministarstvu komunikacija i prometa BiH.
2. Da li će biti prihvaćena ideja da se na platou ispred Parlamentarne skupštine BiH postave biste dobitnika Nobelove nagrade iz BiH?

Salko Sokolović:

„Kada će gospodin Alagić, pa samim tim i nadležno ministarstvo i agencija u kojoj je radio, saznati da je protiv njega obustavljena istraga, da bi se mogao vratiti na posao?“

Husein Nanić:

„Tražim od Ministarstva za ljudska prava i izbjeglice BiH da mi se dostavi informacija o planu i utrošku sredstava za povratak kao i kriteriji pod kojima su sredstva odobrena u 2009. godini, uključujući i sredstva fonda, znači sredstva koja su udružena - entitetska i sredstva državnog ministarstva.“

Selim Bešlić:

„Kako su izabrani šefovi disciplina u Kliničkom centru Sarajevo a kako je to regulirano Statutom Kliničkog centra u Sarajevu?“

Velimir Jukić:

„Postavljam pitanje Vijeću ministara BiH, SIPA-i, OSA-i, entitetskim i kantonalnim MUP-ovima i nadležnim tužilaštvima - šta rade i šta preduzimaju u suzbijanju sve učestalije pojave zatvaranja ili gašenja, prestanka rada određenih preduzeća i osnivanju novih koji nastavljaju raditi isti posao u istim prostorijama, sa istim zaposlenicima i zapravo samo su promijenili ime?“

Azra Alajbegović :

„Molim da mi se dostavi izvještaj o dosadašnjem radu Agencije za razvoj visokog obrazovanja, kao i izvještaj o dosadašnjem radu Međurektorske konferencije.“

Vinko Zorić:

„Zašto se BHT odlučila na zabranu samo jedne riječi (županije) u svom programu?“

Milorad Živković:

1. Da li je Kolegij Tužilaštva BiH razmatrao i eventualno donio odluku da se potjernice Tužilaštva iz Republike Srpske (pretpostavljam da se odnosi na one koje tretiraju ratne zločine) prethodno moraju pregledati i odobriti isključivo u Tužilaštvu BiH?
2. Da li Ministarstvo civilnih poslova BiH raspolaže informacijom da li su u entitetskim ministarstvima pripremljeni zakonski ili podzakonski akti koji govore o pravima i obavezama primalja - babica, s obzirom da se oni ne mogu donijeti na nivou BiH, jer je u pitanju isključiva nadležnost entiteta? Također, molim da mi se dostave podaci na koji način se trenutno u entitetima u skladu s postojećom legislativom vrši edukacija i stručno obrazovanje i usavršavanje osoba koje su babice – primalje ili to namjeravaju biti? Da li ministarstva saraduju po ovim pitanjima s Udruženjem babica u BiH, s obzirom da sam u kontaktu s njima i stekao sam utisak da imaju konstruktivne prijedloge u smjeru poboljšanja postojećeg stanja i prakse?

Sadik Ahmetović:

„U Bratuncu su 12. jula boravila tri poslanika iz Republike Srbije i direktno potpirivali međunacionalnu mržnju na području istočne BiH što je doprinijelo ili doprinosi destabilizaciji ukupnih odnosa na tom području. Šta je Ministarstvo vanjskih poslova BiH preduzelo i da li je uputilo ikakav protest, notu Ministarstvu vanjskih poslova Republike Srbije, Republici Srbiji?“

Ad. 3. Zahtjev poslanika Stranke za Bosnu i Hercegovinu za razmatranje Prijedloga zakona o dopuni Zakona o plaćama i naknadama u institucijama BiH po hitnom postupku, u skladu s članom 127. Poslovnika

Predsjedavajući je dao uvodne napomene.

U ime predlagачa diskutirao je Sadik Bahtić, a u raspravi su učestvovali: Bakir Izetbegović, Drago Kalabić, Sadik Bahtić, Sadik Ahmetović, Husein Nanić, Remzija Kadrić, Jozo Križanović, Salko Sokolović, Milorad Živković, Adem Huskić, Šefik Džaferović, Azra Alajbegović, Jerko Ivanković Lijanović, Slavko Jovičić, Zlatko Lagumdžija i Milica Marković.

Prilikom glasanja „za“ je bilo 18 poslanika (iz Federacije BiH 16, iz Republike Srpske dva), „protiv“ 15, „suzdržana“ dva. Predsjedavajući je konstatirao da nema potrebne entitetske većine i da će Kolegij naknadno obaviti usaglašavanje.

Ad. 4. Zahtjev poslanika Jerka Ivankovića Lijanovića za razmatranje Prijedloga zakona o izmjenama Zakona o akcizama u BiH po hitnom postupku, u skladu s članom 127. Poslovnika

Nakon uvodnih napomena predsjedavajućeg u raspravi su učestvovali Jerko Ivanković Lijanović i Bajazit Jašarević.

„Za“ zahtjev za hitni postupak glasalo je devet poslanika, „protiv“ 26, „suzdržana“ su bila dva. Zahtjev nije usvojen. Zatim se Dom, u skladu s Poslovníkom, izjasnio o skraćenoj proceduri. „Za“ je bilo 12 poslanika, „protiv“ 23, „suzdržana“ tri. Predsjedavajući je konstatirao da će se Prijedlog zakona o izmjenama Zakona o akcizama u BiH razmatrati u redovnoj proceduri.

Ad. 5. Zahtjev Vijeća ministara BiH za razmatranje Prijedloga zakona o izmjeni i dopuni Okvirnog zakona o visokom obrazovanju BiH po hitnom postupku, u skladu s članom 127. Poslovníka

Nije bilo rasprave nakon uvodnih napomena predsjedavajućeg.

Dom je, s 33 glasa „za“ (iz Federacije BiH 24, iz Republike Srpske devet), tri „protiv“ i jednim „suzdržanim“ glasom, usvojio zahtjev za hitni postupak.

Zatim je, s 34 glasa „za“ (iz Federacije BiH 25, iz Republike Srpske devet), jednim „protiv“ i tri „suzdržana“ glasa, usvojen Prijedlog zakona o izmjeni i dopuni Okvirnog zakona o visokom obrazovanju BiH.

Ad. 6. Zahtjev poslanika Adema Huskića za razmatranje Prijedloga zakona o dopuni Zakona o službenom glasilu BiH po skraćenom postupku, u skladu s članom 126. Poslovníka

Predsjedavajući je dao uvodne napomene nakon kojih nije bilo rasprave.

Prilikom glasanja, s 30 glasova „za“ (iz Federacije BiH 25, iz Republike Srpske pet), sedam „protiv“ i jednim „suzdržanim“ glasom, usvojen je zahtjev za skraćeni postupak.

Ad. 7. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH, predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku (drugo čitanje)

Nije bilo rasprave nakon uvodnih napomena predsjedavajućeg.

Prijedlog zakona o izmjenama i dopunama Zakona o osnovama sigurnosti saobraćaja na putevima u BiH, predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku, usvojen je u drugom čitanju jednoglasno - sa 38 glasova „za“ (iz Federacije BiH 26, iz Republike Srpske 12).

Ad. 8. Prijedlog zakona o izmjenama i dopunama Zakona o plaćama i naknadama u institucijama Bosne i Hercegovine (drugo čitanje)

Predsjedavajući je u uvodnim napomenama rekao da je Komisija za finansije i budžet usvojila Zakon u predloženom tekstu, te da Slavko Jovičić u plenarnoj fazi brani 13 amandmana.

Nije vođena rasprava.

Prilikom glasanja, Dom se prvo izjasnio o amandmanima Slavka Jovičića. Obavljeno je jedinstveno glasanje. Amandmani nisu usvojeni – „za“ je bilo šest poslanika, „protiv“ 20, „suzdržanih“ 12 poslanika.

Nakon toga, pristupilo se glasanju o Prijedlogu zakona. „Za“ su bila 22 poslanika (iz Federacije BiH 20, iz Republike Srpske dva), „protiv“ pet i „suzdržanih“ 10. Predsjedavajući je konstatirao da nema dovoljne entitetske većine, ta da će Kolegij naknadno obaviti usaglašavanje o Prijedlogu zakona o izmjenama i dopunama Zakona o plaćama i naknadama u drugom čitanju.

Ad. 9. Prijedlog zakona o izmjenama i dopunama Zakona o sportu u BiH, predlagač: poslanik Denis Bećirović (drugo čitanje)

Predsjedavajući je rekao da je Ustavnopravna komisija prihvatila Zakon u predloženom tekstu, kao i da u plenarnoj fazi nije bilo amandmana.

Nije bilo rasprave ni u okviru ove tačke.

Prijedlog zakona o izmjenama i dopunama Zakona o sportu u BiH, predlagač: poslanik Denis Bećirović, usvojen je u drugom čitanju s 36 glasova „za“ (iz Federacije BiH 26, iz Republike Srpske 10), bez glasova „protiv“ i dva „suzdržana“ glasa.

Ad. 10. Prijedlog zakona o izmjenama i dopunama Izbornog zakona BiH, s Mišljenjem Ustavnopravne komisije (predlagač: Komisija za ostvarivanje ravnopravnosti spolova)

Predsjedavajući je podsjetio da Ustavnopravna komisija nije podržala principe Prijedloga zakona. U raspravi su učestvovali: Vinko Zorić, Šefik Džaferović, Slavko Jovičić, Azra Alajbegović, Jozo Križanović, Momčilo Novaković, Velimir Jukić, Milica Marković, Mirjana Malić, Martin Raguž, Bakir Izetbegović, Lazar Prodanović, Sefer Halilović, Ekrem Ajanović, Zlatko Lagumdžija, Remzija Kadrić, Milorad Živković i Slavko Matić.

Dom nije prihvatio Mišljenje Ustavnopravne komisije („za“ je glasalo 16 poslanika, „protiv“ 16, „suzdržanih“ šest), što znači da se Prijedlog zakona o izmjenama i dopunama Izbornog zakona BiH vraća Komisiji radi ponovnog razmatranja i dostavljanja Mišljenja Domu.

Nakon toga, sa 27 glasova „za“ (iz Federacije BiH 19, iz Republike Srpske osam), sedam „protiv“ i četiri „suzdržana“ glasa, usvojeni su zaključci koje je u raspravi predložio Vinko Zorić, a koji glase:

1. **Ne prihvata se Mišljenje Ustavnopravne komisije o Prijedlogu zakona o izmjenama i dopunama Izbornog zakona BiH, predlagača Komisije za ostvarivanje ravnopravnosti spolova.**
2. **Komisija će ponovo razmotriti Prijedlog zakona i izraditi novo mišljenje u roku od 30 dana.**
3. **Ako mišljenje ponovo bude negativno, Ustavnopravna komisija će jasno i argumentirano obrazložiti razloge za odbijanje principa Zakona, u skladu s članom 107. stav (1) Poslovnika Predstavničkog doma.**

Ad. 11. Prijedlog zakona o izmjenama i dopunama Zakona o slobodi pristupa informacijama u BiH, predlagači: poslanici Sefer Halilović, Vinko Zorić, Mirko Okolić, Šemsudin Mehmedović, Denis Bećirović, Velimir Jukić i Adem Huskić (prvo čitanje)

Nakon uvodnih napomena predsjedavajućeg, u raspravi su učestvovali: Sefer Halilović, Remzija Kadrić, Slavko Jovičić i Vinko Zorić.

Prijedlog zakona iz ove tačke usvojen je u prvom čitanju jednoglasno - sa 38 glasova „za“ (iz Federacije BiH 26, iz Republike Srpske 12).

Nakon toga, Dom se izjasnio o zaključcima koje su u raspravi predložili Slavko Jovičić i Remzija Kadrić.

Zaključak Slavka Jovičića usvojen je sa 21 glasom „za“ (iz Federacije BiH 13, iz Republike Srpske osam), četiri „protiv“ i 10 „suzdržanih“ glasova. Zaključak glasi:

„Predstavnički dom Parlamentarne skupštine BiH zadužuje nadležne institucije BiH (SIPA-u i Tužilaštvo) da, u okviru svojih zakonskih ovlaštenja, provedu sve mjere i radnje i da utvrde iznose i utrošak donacija koje su stigle u BiH, od 1996. godine pa sve do danas, te da nakon završenog posla kompletan materijal dostave Istražnoj komisiji Predstavničkog doma za utvrđivanje trošenja donatorskih sredstava.“

„Za“ prijedlog zaključka Remzije Kadrića glasala su 22 poslanika (iz Federacije BiH 18, iz Republike Srpske četiri), „protiv“ pet, „suzdržanih“ je bilo osam. Zbog nedovoljne entitetske većine

Kolegij je odmah obavio usaglašavanje. Saglasnost nije postignuta. U drugom krugu glasanja zaključak je usvojen sa 21 glasom „za“, osam „protiv“ (iz Federacije BiH jedan, iz Republike Srpske sedam) i šest „suzdržanih“. Zaključak glasi:

„Sugerira se članovima Istražne komisije za utvrđivanje trošenja donatorskih sredstava da rad u Komisiji obavljaju bez naknade.“

Ad. 12. Izvještaj komisije Kolegija o nastojanju za postizanje saglasnosti o Prijedlogu zakona o izmjeni Zakona o državnoj himni BiH (zakon u prvom čitanju)

Predsjedavajući je podsjetio da Kolegij nije postigao saglasnost.

U drugom krugu glasanja Prijedlog zakona o izmjeni Zakona o državnoj himni BiH usvojen je u prvom čitanju s 26 glasova „za“, osam „protiv“ (iz Republike Srpske) i tri „suzdržana“ glasa.

Ad. 13. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Krivičnog zakona BiH, predlagači: poslanici Ekrem Ajanović, Adem Huskić i Remzija Kadrić (zakon u prvom čitanju)

Kolegij nije postigao saglasnost ni o ovom prijedlogu zakona.

U drugom krugu „za“ su glasala 23 poslanika, „protiv“ 10 (iz Republike Srpske), „suzdržana“ četiri. Dakle, Prijedlog zakona je odbijen, s obzirom da su 2/3 poslanika iz Republike Srpske glasale „protiv“.

Ad. 14. Izvještaj komisije Kolegija o nastojanju za postizanje saglasnosti o Inicijativi poslanika Sadika Ahmetovića za uvrštavanje u dnevni red Predstavničkog doma tačke: Proglašenje 11. jula Danom sjećanja u cijeloj Bosni i Hercegovini na žrtve genocida koji je 1995. godine počinjen u Srebrenici

Također, saglasnost nije postignuta ni o Inicijativi iz ove tačke.

U drugom krugu „za“ je bilo 26 poslanika, „protiv“ 10 (iz Republike Srpske), „suzdržan“ jedan poslanik – Inicijativa nije usvojena.

Ad. 15. Razmatranje Gender akcionog plana Vijeća ministara BiH i preporuka UN-ovog Komiteta za eliminaciju diskriminacije žena s prijedlogom zaključaka Komisije za ostvarivanje ravnopravnosti spolova

Predsjedavajući je dao uvodne napomene.

Kratko je diskutirao Vinko Zorić.

Gender akcioni plan Vijeća ministara BiH i preporuke UN-ovog Komiteta za eliminaciju diskriminacije žena primljen je k znanju jednoglasno - s 37 glasova „za“ (iz Federacije BiH 25, iz Republike Srpske 12).

Nakon toga, s 35 glasova „za“ (iz Federacije BiH 26, iz Republike Srpske devet), dva „protiv“ i jednim „suzdržanim“ glasom, usvojeni su zaključci Komisije za ostvarivanje ravnopravnosti spolova, koji glase:

1. **Predstavnički dom Parlamentarne skupštine BiH upoznat je sa sljedećim dokumentima:**
 - a) **Gender akcionim planom Vijeća ministara BiH i**
 - b) **Zaključnim komentarima Komiteta za eliminaciju diskriminacije žena za Bosnu i Hercegovinu.**
2. **Predstavnički dom daje punu podršku Gender akcionom planu Vijeća ministara BiH i zahtijeva njegovo puno provođenje, te traži da ga Vijeće ministara BiH godišnje izvještava o provođenju GAP-a posredstvom nadležne parlamentarne komisije.**

3. **Predstavnički dom pozdravlja napredak ostvaren u provođenju preporuka Komiteta za eliminaciju diskriminacije žena, te poziva na daljnje ulaganje napora za potpuno provođenje preporuka.**
4. **Predstavnički dom nastaviti će ispunjavati obaveze iz preporuka Komiteta za eliminaciju diskriminacije žena, koje se odnose na usklađivanje zakona sa Zakonom o ravnopravnosti spolova u BiH.**
5. **Predstavnički dom pristupiti će usaglašavanju Izbornog zakona BiH sa Zakonom o ravnopravnosti spolova u BiH, radi povećanja udjela žena u organima zakonodavne vlasti, te daje podršku Komisiji za ostvarivanje ravnopravnosti spolova Predstavničkog doma za izradu prijedloga izmjena i dopuna Izbornog zakona BiH.**

Ad. 16. Specijalni izvještaj ombudsmena za ljudska prava BiH u vezi sa žalbama žena radi prava na naknade plaća za vrijeme porodijskog odsustva

Nakon uvodnih napomena predsjedavajućeg, u raspravi su učestvovali: Bakir Izetbegović, Milorad Živković, Mirjana Malić, Sadik Ahmetović, Šefik Džaferović, Momčilo Novaković, Husein Nanić, a zatim se Domu obratila ombudsmen za ljudska prava BiH Jasminka Džumhur.

Prilikom glasanja „za“ je bilo 26 poslanika (iz Federacije BiH 24, iz Republike Srpske dva), „protiv“ osam i dva „suzdržana“. Zbog nedovoljne entitetske većine, predsjedavajući je odmah proveo usaglašavanje. Kolegij nije postigao saglasnost. U drugom krugu „za“ je bilo 28 poslanika, „protiv“ 10 (iz Republike Srpske), „suzdržanih“ nije bilo. Predsjedavajući je konstatirao da Specijalni izvještaj ombudsmena za ljudska prava BiH u vezi sa žalbama žena radi prava na naknade plaća za vrijeme porodijskog odsustva nije usvojen.

Nakon izjašnjanja o Izvještaju, Dom je, s 28 glasova „za“ (iz Federacije BiH 17, iz Republike Srpske 11), bez glasova „protiv“ i osam „suzdržanih“, usvojio prijedlog zaključka koji je u raspravi iznio Milorad Živković. Zaključak glasi:

„Zadužuje se Vijeće ministara BiH da u roku od 30 dana, u saradnji s Uredom ombudsmena za ljudska prava BiH, nađe pravni put, u skladu sa Ustavom BiH i relevantnim zakonskim rješenjima, a koji bi omogućio ostvarivanje prava na naknade plaća za vrijeme porodijskog odsustva ženama zaposlenim u institucijama BiH.“

Ad. 17. Informacija o lišavanju slobode u Republici Hrvatskoj Vjekoslava Vukovića, pomoćnika ministra sigurnosti BiH, i aktivnostima preduzetim nakon tog događaja

Predsjedavajući je u uvodnim napomenama, pored ostalog, podsjetio na Mišljenje Zajedničke komisije za odbranu i sigurnost BiH koja je konstatirala da Vijeće ministara BiH nije postupilo u skladu sa zaključcima sa 44. sjednice, održane 21. januara 2009., i 47. sjednice, održane 4. marta 2009., odnosno da nije dostavilo cjelovitu informaciju s prijedlogom određenja prema ovom događaju.

U raspravi su učestvovali: Mirko Okolić, Selim Bešlagić i ministar sigurnosti BiH Tarik Sadović.

Mišljenje Zajedničke komisije prihvaćeno je s 33 glasa „za“ (iz Federacije BiH 21, iz Republike Srpske 12), bez glasova „protiv“ i četiri „suzdržana“ glasa i zaključeno je da se Vijeće ministara BiH zaduži da pristupi realizaciji zaključaka s 44. sjednice.

Ad. 18. Imenovanje članova Vijeća Regulatorne agencije za komunikacije BiH (prijedlog Vijeća ministara BiH)

Predsjedavajući je u uvodnim napomenama podsjetio da je Komisija za saobraćaj i komunikacije predložila Domu da odgodi izjašnjanje o prijedlogu Vijeća ministara BiH za imenovanje članova Vijeća Regulatorne agencije za komunikacije BiH i to do konačne odluke po zahtjevu RAK-a BiH za autentičnim tumačenjem člana 36. st. (2) i (3) i člana 40. stav (1) Zakona o komunikacijama i okončanja zakonom propisane procedure potvrde imenovanja generalnog direktora Agencije.

U raspravi su učestvovali: Branko Dokić, Šemsudin Mehmedović, Momčilo Novaković, Selim Bešlagić, Sadik Bahtić, Husein Nanić, Martin Raguž, Niko Lozančić, Šefik Džaferović, predsjedavajući Vijeća ministara BiH Nikola Špirić, Milorad Živković, Sadik Ahmetović i Jozo Križanović.

Dom se izjašnjavao o Mišljenju Komisije. „Za“ su bila 23 poslanika (iz Federacije BiH 21, iz Republike Srpske dva), „protiv“ 13, „suzdržana“ dva. Odmah je provedeno usaglašavanje zbog nedovoljne entitetske većine. Saglasnost nije postignuta. U drugom krugu „za“ su bila 23 poslanika, „protiv“ 13 (iz Federacije BiH tri, iz Republike Srpske 10), „suzdržana“ dva. Predsjedavajući je konstatirao da Mišljenje Komisije za saobraćaj i komunikacije nije prihvaćeno te je zaključeno je da se Prijedlog Vijeća ministara BiH za imenovanje članova Vijeća Regulatorne agencije za komunikacije BiH vrati Komisiji radi ponovnog razmatranja i dostavljanja Domu mišljenja o navedenom prijedlogu.

Ad. 19. Imenovanje predsjednika, zamjenika predsjednika i članova Nezavisnog odbora i Odbora za žalbe građana kao nezavisnih tijela policijske strukture BiH (prijedlog Ad hoc Zajedničke komisije za provođenje procedure imenovanja Nezavisnog odbora i Odbora za žalbe građana)

Predsjedavajući je dao uvodne napomene.

Nije bilo rasprave.

Dom je, s 33 glasa „za“ (iz Federacije BiH 21, iz Republike Srpske 12), jednim „protiv“ i četiri „suzdržana“ glasa, prihvatio prijedlog Ad hoc komisije i za članove Nezavisnog odbora imenovao: **Žiku Krunića (Srbin), Bakira Dautbašića (Bošnjak), Matu Jožića (Hrvat), Viktora Dadića (Hrvat), Ljubomira Kuravicu (Srbin), Enesa Obraliću (Bošnjak), Dragana Savića (Srbin), Stanka Nuića (Hrvat) i Ziju Kadića (Bošnjak)**. Žiko Krunić imenovan je za predsjednika, Bakir Dautbašić za prvog zamjenika, a Mato Jožić za drugog zamjenika predsjednika Nezavisnog odbora.

S 33 glasa „za“ (iz Federacije BiH 21, iz Republike Srpske 12), dva „protiv“ i tri „suzdržana“ glasa, za članove Odbora za žalbe građana imenovani su: **Mate Miletić (Hrvat), Amela Bašić (Bošnjakinja), Borislav Radić (Srbin), Danica Berić (Hrvatica), Ermin Pešto (Bošnjak), Marijan Milićević (Srbin) i Hamida Karčić (Bošnjakinja)**. Mate Miletić imenovan je za predsjednika, Amela Bašić za prvog zamjenika, a Borislav Radić za drugog zamjenika predsjednika Odbora za žalbe građana.

Ad. 20. Potvrđivanje Odluke predsjedavajućeg Vijeća ministara BiH o smjeni ministra sigurnosti BiH i zamjenika predsjedavajućeg Vijeća ministara BiH Tarika Sadovića

Predsjedavajući je dao uvodne napomene.

U okviru ove tačke vođena je duža rasprava u kojoj su učestvovali: predsjedavajući Vijeća ministara BiH Nikola Špirić, Mehmed Suljkanović, Ekrem Ajanović, Jozo Križanović, Rifat Dolić, Savo Erić, Branko Dokić, Milorad Živković, Adem Huskić, Salko Sokolović, Momčilo Novaković, Drago Kalabić, Bakir Izetbegović, Denis Bećirović, Remzija Kadrić, Milica Marković, Mirko Okolić, Sadik Bahtić, Sadik Ahmetović, Zlatko Lagumdžija, Halid Genjac, ministar sigurnosti BiH Tarik Sadović i Martin Raguž.

Odluka predsjedavajućeg Vijeća ministara BiH o smjeni ministra sigurnosti BiH i zamjenika predsjedavajućeg Vijeća ministara BiH Tarika Sadovića potvrđena je s 28 glasova „za“ (iz Federacije BiH 17, iz Republike Srpske 11), sedam „protiv“ i tri „suzdržana“ glasa.

Ad. 21. Prijedlog odluke o dopuni Odluke o imenovanju članova Vijeća nacionalnih manjina BiH (predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku)

Nije bilo rasprave nakon uvodnih napomena predsjedavajućeg.

Dom je jednoglasno - s 34 glasa „za“ (iz Federacije BiH 22, iz Republike Srpske 12) - usvojio Prijedlog odluke o dopuni Odluke o imenovanju članova Vijeća nacionalnih manjina BiH i imenovao Hakana Varana (Turčin) za člana Vijeća nacionalnih manjina BiH.

Ad. 22. Razmatranje „Zaključaka o štetnosti antidejtonskog i jednostranog djelovanja predsjednika Republike Srbije Borisa Tadića u državi Bosni i Hercegovini“, predlagač: poslanik Denis Bećirović

Predsjedavajući je podsjetio da je Dom na prethodnoj sjednici, nakon što Kolegij nije postigao saglasnost, odlučio da se ova tačka uvrsti u dnevni red.

Nije bilo rasprave.

Prilikom glasanja o zaključcima „za“ su bila 23 poslanika (iz Federacije BiH 21, iz Republike Srpske dva), „protiv“ devet, „suzdržanih“ pet. Predsjedavajući je odmah proveo usaglašavanje zbog nedovoljne entitetske većine. Kolegij nije postigao saglasnost. U drugom krugu „za“ je bilo 20 poslanika, „protiv“ 10 (iz Republike Srpske), „suzdržanih“ tri. Zaključci iz ove tačke dnevnog reda nisu prihvaćeni.

Ad. 23. Razmatranje sigurnosne situacije u Tuzlanskom kantonu i Tuzli, s posebnim osvrtom na zaključke vanredne sjednice Općinskog vijeća Tuzla (dostavljeni Parlamentarnoj skupštini BiH 7.7.2009.)

U raspravi su učestvovali: Denis Bećirović, Milorad Živković, Šemsudin Mehmedović, Jozo Križanović, Drago Kalabić, Selim Bešlagić, Bakir Izetbegović, Sadik Ahmetović, Denis Bećirović, Husein Nanić, Martin Raguž, Momčilo Novaković, Slavko Jovičić, Bajazit Jašarević, Zlatko Lagumdžija, Sadik Bahtić i Branko Dokić.

Dom je prvo glasao o zaključcima koje je u raspravi predložio Denis Bećirović. „Za“ je glasalo 27 poslanika (uz Federacije BiH 23, iz Republike Srpske četiri), „protiv“ pet, „suzdržana“ dva. Nije bilo dovoljne entitetske većine pa je predsjedavajući proveo usaglašavanje. Kolegij nije postigao saglasnost. U drugom krugu „za“ je bilo 26 poslanika, „protiv“ 10 (iz Republike Srpske), „suzdržan“ jedan poslanik. Predsjedavajući je konstatirao da Dom nije usvojio zaključke Denisa Bećirovića.

Nakon toga, provedeno je glasanje o zaključku koji je u raspravi predložio Milorad Živković. Zaključak je usvojen („za“ su glasala 32 poslanika /iz Federacije BiH 20, iz Republike Srpske 12/ „protiv“ jedan, „suzdržana“ tri) i glasi:

„Predstavnički dom Parlamentarne skupštine BiH poziva Vijeće ministara BiH da u što kraćem roku realizira zaključke Doma, usvojene na 55. sjednici, održanoj 10.6.2009., povodom rasprave o Informaciji o stanju sigurnosti u Bosni i Hercegovini u 2008. godini.“

Ad. 24. Davanje saglasnosti za ratifikaciju:

- a) Sporazuma o uspostavljanju Regionalne škole za javnu upravu (ReSPA),
- b) Dodatnog protokola uz Evropsku konvenciju o uzajamnoj pomoći u krivičnim stvarima,
- c) Konvencije o procjeni okolišnih uticaja u prekograničnom kontekstu – Espoo (Finska), 25. februara 1991. godine,
- d) Konvencije o sprečavanju većih industrijskih nezgoda, br. 174. iz 1993. godine, i Preporuka o sprečavanju većih industrijskih nezgoda, br. 181. iz 1993. godine, Međunarodne organizacije rada,
- e) Preporuke o otvaranju radnih mjesta u malim i srednjim preduzećima, br. 189. iz 1998. godine, Međunarodne organizacije rada,
- f) Preporuke o promoviranju zadruga, br. 193. iz 2002. godine, Međunarodne organizacije rada,
- g) Preporuke koja se odnosi na listu profesionalnih oboljenja, br. 194. iz 2002. godine, Međunarodne organizacije rada,

- h) Preporuke o razvoju ljudskih potencijala, obrazovanju, osposobljavanju i stalnom usavršavanju, br. 195. iz 2004. godine, Međunarodne organizacije rada,
- j) Preporuke koja se tiče radnog odnosa, br. 198. iz 2006. godine, Međunarodne organizacije rada.

Predsjedavajući je rekao da je Komisija za vanjske poslove dala pozitivno mišljenje o davanju saglasnosti za ratifikaciju sporazuma.

Saglasnost za ratifikaciju sporazuma data je jednoglasno - s 36 glasova „za“ (iz Federacije BiH 24, iz Republike Srpske 12).

Time je realiziran dnevni red.

Predsjedavajući je podsjetio da će nastavak 13. zajedničke sjednice oba doma biti održan sutra, 24. jula 2009., a da je naredna, 59. sjednica Doma, planirana za 2. septembar 2009. Također je kazao da će jedna sjednica Doma, ako se za to ukaže potreba, biti održana tokom augusta.

Sjednica je završena u 21,40 sati.

Sastavni dio Zapisnika je transkript 58. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Beriz Belkić